

關中金石文字存逸考

關中金石文字存逸考卷七

揚州甘泉毛鳳枝撰

涇陽縣

北魏

道士張相造天尊像銘

正書
延昌二年二月

未詳所在

全文見金石萃編張相作張相隊

寰宇訪碑錄云在涇陽今未詳所在

郭法洛造像記

正書
孝昌二年三月

未詳所在

全文見金石萃編補遺

帖賈李氏云在涇陽今未詳所在

西魏

吳神達造像記

正書

大統十五年

未詳所在

全文見金石萃編

寰宇訪碑錄云在涇陽今未詳所在
潛研堂金石文字目錄題爲邑子造像記

北周

合邑三十人造像記

正書

天和二年

未詳所在

全文見金石萃編題爲李男香造像記
潛研堂金石文字目錄題爲邑子造像記
實一碑也
寰宇訪碑錄云在涇陽今未詳所在

邑子造像記

正書

天和四年六月

未詳所在

全文見金石萃編題爲顏那米造像記

隋

楊遵義造像銘

正書

開皇三年十二月

未詳所在

全文見金石萃編

邑子八十人造阿彌陀像記

正書

開皇十六年三月

未詳所在

全文見金石萃編題爲王女暉等造像記

右三種寰宇訪碑錄云均在涇陽今未詳所在

賀蘭使君墓誌銘篆蓋

篆書陽文

存

右篆蓋題云大隋開府武始肅公賀蘭使君之墓誌帖賈段氏云在涇陽廟中僅存石蓋誌石久逸矣案北史賀蘭祥傳祥子寬開府儀同大將軍武始公入隋歷汴鄭二州刺史與其兄師並著政績此石題銜與北史同當卽賀蘭寬誌銘之篆蓋也

唐

陀羅尼經幢

正書
儀鳳元年

存

涇陽縣志云在縣屬石莊村大道邊字跡模糊

陀羅尼經幢

正書
年月泐中有武后製字僅存上截

存

寰宇訪碑錄云在涇陽潛研堂金石文字目錄

云此幢行書祿隸體焉

佛頂尊勝陀羅尼佛說無垢淨光大陀羅尼神咒

正書

天寶三載二月

存

經文不錄

涇陽社樹鎮姚氏家藏二咒同刻一石

逸人竇居士碑

李邕撰段清雲行書
天寶六載二月

存

全文見金石萃編

涇陽縣志云在縣北魯橋鎮鎮在三原縣北本

涇陽境也關中金石記諸書皆謂此碑在三原
蓋以境接三原而誤案杜工部八哀詩詠李
邕云干謁走其門碑版照四裔又云豐屋珊瑚
鉤麒麟織成罽紫駟隨劔几義取無虛歲舊唐
書云邕受納饋遺多至鉅萬時議以爲鬻文獲
財未有如邕者此碑邕撰而書者乃爲段清雲
蓋碑立於天寶六載二月邕於是年正月杖死
未及書丹故清雲補書之也清雲書亦仿北海
惟圓潤有餘而雄肆不逮耳

忠武軍監軍使朱孝誠碑

蘇遇撰曹鄴行書
長慶元年二月

存

全文見金石萃編

涇陽縣志云此碑與竇居士碑均在縣北魯橋
鎮他書謂在三原者誤 案通鑑唐紀穆宗長
慶四年敬宗卽位李逢吉謀逐李紳有楚州刺
史蘇遇爲逢吉之黨畫策卽此蘇遇矣 潛研
堂金石文跋尾云此碑乾隆戊子歲縣人培土
得之書法流麗可愛蓋唐人院體之佳者
佛頂尊勝陀羅尼咒幢 正書僧義肅義倫等造
長慶元年十月 存

涇陽縣志云在社樹村海角寺

佛頂尊勝陀羅尼經幢

行書沙門法惠等造
大和七年歲次癸丑四月

存

涇陽縣志云在大安寺門外

尊勝陀羅尼經幢并銘

張鍊行書
無年月

存

序銘見金石萃編

尊勝陀羅尼經幢并後序

行書無年月後有歲在作
噩及安定皇甫賓字

存

序見金石萃編題爲皇甫賓經幢

右二種寰宇訪碑錄云均在涇陽

三原縣

北魏

邑子李映超等造像記并碑側

正書
無年月

存

全文見金石萃編補遺

吳縣吳清卿副憲視學秦中訪得此石於三原渠水內正面刻題名多李姓似富平曹氏造像記刻碑側又一側亦刻題名字體古拙爲北魏書無疑也

造像殘字

正書

前有一佛像後題有口月戊申朔等字存

全文見金石萃編補遺

帖賈惲氏云出於三原

北周

邑子任口等四面像題名

正書

無年月一面有至正十四

年八月字

未詳所在

全文未見

隋

邑子六十人造四面像銘

正書
開皇三年五月

未詳所在

全文未見

右二種寰宇訪碑錄云均在三原縣今未詳所

在矣

唐齊士員造像銘

正書
貞觀十三年歲次己亥正月乙巳

朔

存

全文見金石錄編補遺

此碑前幅題名云右監門中郎將延陵子齊士
員恒州行唐人也王保府折衝都尉趙伽頻陽
府田阿女懷信府果毅都尉獨孤範天齊府
律瓌長豐府王仁感頻陽府關文瓚左右監門
校尉三原縣令檢校陵署令崔口王署丞裴珉
內省禦侮尉郭元宗陵寢二所宿衛人呂村
任村王村劉村朱村唐祿村房村袁村謝村宿
老爲太武皇帝太穆皇后敬造石佛殿一所
并造彌陀像二菩薩師子香爐座四面爲宮內
存亡寫金剛波若觀世音經各一部及一切經

目云云後幅題名云右監門中郎將右勳衛郎
將檢校左右領府郎將長樂宮大監定州刺史
上柱國延陵縣開國子齊士員曾祖□□平南
將軍豫州汝南郡太守祖思齊尙食典御父□
隋荊州記室參軍兄傲隋廬州司兵參軍妻呂
氏延陵郡君世子□師右翊衛息世武文德皇
后挽郎息世文世才世貴孫神感神法神兩世
文以下並幼未登仕長女潘水府果毅和直妻
女娘兒云云此後刻閻羅王像地獄人畜各有
題識如公牘條例之式殆所謂陰律也

此碑當出三原縣獻陵士員爲守陵之官故爲

太武皇帝太穆皇后造像以資冥福太武皇帝

唐高祖也

新唐書本紀高祖初謚太武廟號高祖上元元年改謚神堯皇帝天寶八

載謚神堯大聖皇帝十三載

太穆皇后寶后也

新唐書本傳寶后初謚曰穆及祔獻陵尊

碑刻

爲太穆皇后上元中益謚太穆神皇后於唐初而書法精整頗得隋人楷法所載守衛

陵寢制度亦可以資考證碑書斛作𪚩通鑑陳

紀太建七年北周勳州刺史韋孝寬間北齊將

斛律光密爲謠言曰百升飛上天祖珽與光相

惡解之曰百升者斛也𪚩字本此又碑中升還

之遐作霞蛙黽之黽作蠅當係筆誤 新唐書

地理志京兆有府百三十一今有名者僅十一

府此碑所載之王保府頻陽府懷信府天齊府

長豐府潘水府共六府皆百三十一府中所逸

之名也可補地志之闕 新唐書百官志左右

監門衛將軍所屬中郎將各四人正四品下又

有校尉三百二十人武散階從八品上曰禦侮

校尉從八品下曰禦侮副尉左右領軍衛左右

郎將各一人正五品上 宗正寺卿所屬諸陵

臺令各一人從五品上丞各一人從七品下本

名陵署令天寶十載改獻昭乾定橋五陵署爲
臺升令品碑中崔某蓋以三原縣令兼檢校陵
署令也三原在唐爲畿縣畿縣令正六品上

司農寺卿所屬京都諸宮苑總監各一人正五
品下長樂宮監之名新唐書百官志未載案方
輿紀要云漢長樂宮在今陝西西安府城西十
四里長安故城東隅周二十里本秦興樂宮也
漢高帝五年都長安九月治長樂宮七年宮成
東漢初廢西魏以後復修治之隋大業十三年
唐公淵軍馮翊進趣長安命世子建成等自永

豐西趨新豐進至長樂宮是也天寶以後廢此
碑刻於貞觀時故有長樂宮監之名其後宮廢
官省故百官志未載其名也碑云士員嘗爲左
一軍頭案百官志左右果毅都尉下注云武德
元年改鷹揚郎將曰軍頭正四品下

隋文州總管陸讓碑

陳口口撰郭微正書
唐貞觀十七年歲次癸卯立

存

全文見金石萃編

此碑今在三原縣獻陵讓蓋卒於隋大業六年
至唐貞觀十七年乃立碑也寰宇訪碑錄未詳
此碑所在又誤書貞觀十七年爲二十七年其

實太宗在位二十三年也此蓋筆誤宜正之

左監門大將軍襄城郡公樊興碑

正書

永徽元年七月存

全文見金石萃編補遺

碑略云公諱興字積慶安陵人也高祖弼魏武
陵太守曾祖叡魏員外散騎常侍巴州刺史新
淦縣開國侯祖文實隋南陵太守父方皇朝
金紫光祿大夫慶善宮監公攀鱗晉野奉勒汾
口義旗肇建乃授朝請大夫尋破西河授通議
大夫又平霍邑加金紫光祿大夫既而克定京
邑加左光祿大夫除左監門郎將未幾以功次

除左監門將軍以破薛舉勲授上柱國西華縣
開國公賞物五百段劉武周口口絳水肆虐懷
生公迺奉旌麾而電邁溺驂馳而風掃乃封襄
城郡開國公賞物千段于時三川震蕩羣醜虔
劉王世充寶建德因茲口口勲餘十二轉迴
授其子賜物二千段金卅斤武德五年建德重
茲完聚帶州挺亂於是長驅銳騎封稀滅叛加
勲口轉賜物千段并奴婢牛馬劉黑闥跋口口
口陳兵曠歲公克宣智勇殲厥奸渠以超輩之
勲賞物六百段六年破徐員朗於徐充厥功斯

懋賞物千段口廿七年手詔以公策名日久
立効居多因口口口軍將八年獯獫犯塞大駭
涇陽公摧鋒轉鬪羣凶折首九年以公夙昭勤
効給封四百戶授營國公貞觀六年破陵州羣
獠賞口六口口口授左驍衛將軍坐公事削十
一年還除右監門將軍十一年扈從巡口口授
右驍衛大將軍領千騎十八年授雲麾將軍守
左監門大將軍封襄城郡開國公食邑二千戶
十九年鑾輿東指龔行遼隧公於定州奉令乘
駟口口副梁國公宮城畱守宸駕凱旋特蒙勞

喻賜物三百段檢校右武侯大將軍廿二年從
幸玉華宮因而畱守有頃乃嬰風疾敕遣名
醫就療賜告還京既藥亟加閒月而愈廿三年
除左監門大將軍屬宮車晏出綽韜晨移奉
端闈而限赴望疑山而崩標從而負茲彌痼悵
景推辰有司以寢瘵逾時因而奏解爰降綸
汗恩贍尤多給防閤祿賜國官輔佐帳內一依
見職并遣醫資藥終始將療又降中使就第慰
問賜絹口匹終期介冑爲禮孤標細柳之名鐵
石居心獨擅下江之懿如何尺波行閱風駭龍

驥之水一葉可悲霜凋馬陵之樹以永徽元年
四月廿三日終於雍州長安縣懷遠里第春秋
六十有三贈左武衛大將軍洪州都督江饒吉
袁鄂虔撫八州諸軍事使持節洪州刺史賻絹
布二百匹陪葬 獻陵賜東園祕器喪事所須
隨由資辦給儀仗去還諡曰思公禮也粵以其
年歲次庚戌七月戊戌朔九日景午陪葬於
獻陵長子護軍濮王府兵曹參軍事修義世子
上騎都尉荆王府法曹參軍事修武云云
此碑本在三原縣獻陵道光八年周貞木學使

移於學使署中字類褚薛唐初佳刻也樊興事
附見新舊唐書劉文靜傳後所載官爵不若碑
詳而與字積慶謚思公傳中未載得此可補其
闕濮王名泰太宗子三宗諸子傳有兩荆王一
名元景始王趙後封荆一名元則始封荆後徙
封彭皆高祖子焉後漢書王常傳光武帝於大
會中指常謂羣臣曰此家率下江諸將輔翼漢
室心如金石眞忠臣也是日遷常爲漢忠將軍
碑中鐵石居心獨擅下江之懿卽用此事又封
稀滅姦姦當係妖字 新唐書百官志慶善宮

監一人從六品下文散階從二品曰光祿大夫
左右驍衛大將軍各一人左右監門衛大將軍
各一人左右武衛大將軍各一人均正三品又
注云龍朔二年改左右候衛爲左右金吾衛而
無左右武侯大將軍之名左右候衛左右武侯
是否卽係一官未知其審 碑云賜物二千段
賞物千段案通鑑唐紀高祖武德元年賜常達
帛三百段胡身之注曰唐制凡十段其率絹三
匹布三端綿四斤一作綿四屯
綿六兩爲屯若襍彩十段則
絲布二匹紬二匹綾二匹縵四匹云云碑中所

謂賜物是否卽絹布綿綵絲紬綾縵之類抑係
另有他物謹錄於此以俟考隋書楊素傳賜綵
物三千段是物亦
絲帛之
類矣

襄邑王李神符碑

殷仲容八分書
永徽二年十月

未詳所在

全文見金石萃編補遺

碑略云王諱神符字神符隴西成紀人 景皇

帝之孫鄭孝王之子 太宗文皇帝之從父

今上之從祖也義甯元年封安吉郡公食邑二
千戶仍拜太府少卿俄而天地革運品物咸亨
武德元年封襄邑郡王邑三千戶餘如故轉雍

州司馬于時文軌未口國步斯阻西羌煽禍北
狄稱兵 天子聞輦軫慮推轂伋能乃以
爲平道軍將出鎮岐州其年除稷州諸軍事稷
州刺史四年除并汾口遼太榆七州諸軍事并
州總管以善政入爲太府卿加右光祿大夫檢
校兵部尙書八年除使持節大都督揚潤常和
楚方滁七州口蘇越括歙宣舒循泉九州都督
諸軍事揚州刺史貞觀元年入爲將作大匠兼
散騎常侍轉宗正卿餘官如故旣而備陳誠懇
有感 聖懷方口散秩乃加光祿大夫歲時朝

請防閤祿賜并同京口貞觀二十三年又下
詔授開府儀同三司以永徽二年五月薨於私
第時年七十三以永徽二年歲次辛亥十月庚
寅朔八日丁酉 詔陪葬於 獻陵贈司空使
持節都督荆峽岳朗四州諸軍事并賜東園祕
器儀仗送至墓所口是 主上舉哀於別次禮
也子少府監柱國臨川縣公德懋鳳州刺史廣
川縣公義範懷州刺史上柱國文暕等云云
此碑未經前人箸錄當出三原縣獻陵今未詳
所在矣神符新舊唐書皆有傳新唐書鄭孝王

亮傳中所載官爵事迹多與碑合惟所歷官秩
次序則碑詳於傳也 新唐書兵志武德初始
置軍府析關中爲十二道一曰岐州道三年更
以岐州道爲平道軍軍置將副各一人以督耕
戰以車騎府統之 通鑑唐紀高祖武德八年
以襄邑王神符檢校揚州大都督始自丹陽徙
州府及居民於江北胡身之注曰由此廣陵專
揚州之名此吾鄉掌故也故記之 洪氏乾隆府
志州縣志云
唐武德三年改上元縣曰歸化爲揚州治卽今
江蘇江甯府之上元縣也余案秦漢之丹陽縣
在今安徽太平府當塗縣境一名小丹陽東晉
宋齊梁陳之丹陽郡治所均在今江蘇江甯府

城內至今江蘇鎮江府之丹陽縣乃秦漢之曲阿縣自唐天寶八載以後始改丹陽非漢晉以來之丹陽也 新唐書百官志太府寺卿一人從三

品將作監二人從三品

注云武德初改令曰大匠天寶十一載改大匠

曰大少府監一人從三品又案新唐書百官志

光祿大夫從二品而無左右之名惟隋志有左右光祿大夫正二品神符曾拜右光祿大夫蓋唐初仍因隋制也其後乃去左右之名而改光祿大夫爲從二品今光祿大夫則爲正一品爲文官極崇之階此又古今之不同也 神符本傳謚曰恭此碑題銜恭字正當缺處而碑中亦

未述賜諡之事

豆盧遜墓誌銘

正書 顯慶四年八月

存

全文見古誌石華

誌云窆於萬年縣少陵原

少陵原在長安縣南四十里焉

案此

石今爲三原北城李氏家藏字迹挺秀

越州都督于德芳碑

于志甯撰蘇季子八分書 麟德元年四月

存

全文見金石萃編補遺

寰宇訪碑錄云在三原縣

燕公于志甯碑

令狐德棻撰子立政正書 乾封元年十一月

存

全文見金石萃編

雍州金石記云在三原縣北五十里三家店關
中金石記云在三原縣長勘鄉此碑字體在唐
碑中結構最小而楷法極爲精整

淄川公李孝同碑

諸葛思禎正書
咸亨元年五月

存

全文見金石萃編

雍州金石記云在三原縣北五十里三家店

上護軍龐德威墓誌銘

正書
垂拱三年十一月

存

全文見古誌石華

誌云葬於四池之側案陝西通志長安縣西三十
里有泗池鋪卽四池也此石本出長安今爲

三原北城李氏家藏

明堂令于大猷碑

正書

聖歷三年十一月

存

全文見金石萃編

雍州金石記云在三原縣北五十里三家店關
中金石記云在三原縣長勘鄉

祝府君碑

子欽明撰正書
無年月

存

全文未見

石墨鐫華云此祝欽明敘述其父緄之碑也緄
字叔良功名不顯以欽明貴故豎碑欽明在中
宗朝建議皇后助祭天地其人品毫無足稱但

碑書法是習伯施登善而有得者非近世能書
家所及趙明誠已云姓名殘缺案此石本出三
原縣今逸

兗州都督于知微碑

姚崇撰正書
開元七年六月

存

全文見金石萃編

雍州金石記云在三原縣北五十里三家店

檢校安東副都護口口州口史口永基誌銘

正書
天寶四

載十月

未詳所在

全文見古誌石華續編

此石剝落太甚其姓適當缺處其可辨者有二云

祖珍隋銀青光祿大夫天水郡太守考敬厚

皇朝元從□□□□□□□□拜金紫光祿

大夫□陽公行雍州長安縣令君諱永字隆太

原祁縣人起家左缺右□□副隊正又遷左衛

翊一府缺遷左二府長上校尉缺□命征遼還

拜游擊將軍左金吾衛□陽府左果毅又遷定

遠將軍□□衛□池府折衝都尉上柱國檢校

安東副都護以上元元年二月一日寢疾薨於

安東府之官舍春秋五十有八夫人安定□氏

封安定君以開元十五載十月□□於三原里

之第也越以天寶四載歲乙酉十月乙酉□□
□已酉葬於三原縣北□□原禮也

此石本出三原今未詳所在 新唐書百官志
十六衛翊衛之府二一曰翊一府二曰翊二府
有副隊正二十人正七品下 新唐書兵志高
祖以義兵起太原已定太原悉罷遣歸其願畱
宿衛者三萬人高祖以渭北白渠旁民棄腴田
分給之號元從禁軍後老不任事以其子弟代
謂之父子軍及貞觀初太宗擇善射者百人爲
二番於北門長上曰百騎以從田獵又百官志

云三衛校尉各五人正六品上左右翊中郎將
所屬長入長上二十人直長長上二十人左右
羽林軍左右龍武軍左右神武軍左右神策軍
所屬有長上各十人大都護府副都護二人正
四品上

振威副尉左金吾衛新平郡宜祿府折衝都尉成口

墓誌銘

正書
天寶六載十月

存

全文見古誌石華

誌云葬於長安高陽原案此石本出長安今歸
三原縣北城李氏家藏 誌云成公嘗爲京兆

望苑府別將案新唐書地理志望苑府屬鳳翔
此云屬京兆未知其審又古誌石華錄寫此誌
內有龍交郡龍交府之名考新唐書地理志無
龍交郡之名惟鄜州一名洛交郡所屬有龍交
府則龍交郡當作洛交郡爲是拓本交郡二字
之上正當缺處古誌石華之譌殆以此耶宜正
之 百官志東宮官屬左右清道率府中候各
二人從七品下武散階從六品下曰振威副尉
雲麾將軍左龍武軍將軍劉感墓誌銘

李震撰席彬
行書 天寶

十二載十月

存

全文見古誌石華

誌云葬於咸甯縣黃臺鄉之原案此石本出咸甯今歸三原北城李氏家藏案今帖肆中有張源墓誌託爲大和年刻全襲此誌之文惟改竄姓名年月而舛駁殊甚蓋不通文理者之所爲也十二硯齋金石過眼錄辨之甚詳而不得確據蓋未見此誌之故耳 誌云感嘗爲翊麾校尉又爲左武衛翊府右郎將案新唐書百官志武散階正七品下曰翊麾校尉左右武衛左右翊郎將各一人正五品上又誌云感封彭城郡

開國伯案百官志開國縣伯食邑七百戶正四
品上而無郡伯之名未知其審又誌云感嘗爲
興州大桃戌主陝西通志云大桃戌一作大姚
戌見寰宇記在畧陽縣東四十五里元和郡縣志云
大城戌在順政縣東南四十九里案順政縣卽
今畧陽縣唐時爲興州治所然則大桃大姚大
城實一戌也誌作大桃當從石刻爲正 百官
志凡軍鎮上戌戌主一人正八品下戌副一人
從八品下中戌戌主一人從八品下下戌戌主
一人從九品下戌主戌副掌捍防守禦

通微道訣碑

肅宗御製行書
乾元元年二月

元人重刻

存

全文見金石萃編

寰宇訪碑錄云在三原縣

贈工部尙書臧懷恪碑

顏真卿撰并正書
廣德元年十月

存

全文見金石萃編

雍州金石記云在三原縣九陂城臧氏墓上

鳳枝案此碑雖出魯公手筆而腕力較弱似遜

他碑碑內有題字一行云翰林院待詔光祿寺

卿李秀巖模勒

模勒二字他書誤爲題額
諦視之實模勒二字也

乃知

此碑筆力之弱實由模勒之故論書者不可不

知也近來習顏書者均以此碑爲主臬竊謂顏
書之極有渠燧者以千祿字書多寶塔碑東方
畫像贊元次山碑郭家廟碑離堆記殘字殷夫
人碑爲最雖字迹缺猶係廬山眞面目也此
外如中興頌顏家廟碑八關齋會報德記均經
後人重摹雖具形勢頗乏神采精於書法者當
能辨之宋廣平碑雖係原石而石質粗脆刻缺
太多精神亦不完具也因論臧公碑故附鄙見
於此

左金吾衛將軍臧希晏碑

張季撰韓秀弼八分書

存

大歷五年十月

全文見金石萃編

雍州金石記云在三原縣北九陂城關中金石

記云在三原縣長勘鄉

劍州長史李廣業碑

寶刻類編云鄭雲逵撰并行書貞元二十年十一月

全文見金石萃編

存

雍州金石記云在三原縣北五十里三家店或云在縣之北原案陸讓碑于德芳碑于志甯碑李孝同碑于大猷碑于知微碑臧懷恪碑臧希晏碑李廣業碑秦中帖賈統呼爲獻陵碑其實

惟樊興及襄邑王神符係陪葬者其餘并未陪
葬况陸讓本係隋人卒於大業六年尤不應在
陪葬之列也帖賈因諸碑相距甚近故統呼爲
獻陵碑也陝西通志云唐高祖獻陵在三原縣
東北四十三里

來齋金石考畧謂杜工部有贈劍州李長史廣
業詩即使君高義驅今古寥落三年坐劍州一
首是也今以碑文考之廣業卒於開元十八年
而工部遊蜀在肅宗乾元二年上距開元十八
年有三十一年之久爲時太遠既不足據且工

部集中詩題但云將赴荆南寄別李劍州并無
長史廣業字樣是工部贈詩之李劍州與廣業
確係兩人可無疑義大約考證之學非博極羣
書考其時世詳其踪迹確鑿可據方能下筆否
則缺疑可也

宮闈令充威遠軍監軍西門珍墓誌銘

從姪元佐撰
正書元和

十三年七月

全文見古誌石華

誌云窆於長安縣承平鄉案此石本出長安今
爲三原北城李氏家藏古誌石華云是誌卒

葬年月另敘於銘詞之後前敘及銘係珍作生
壙時命從姪元佐預爲撰刻銘後三行則葬時
補敘也 通鑑注引舊唐書郭子儀傳有威遠
軍係禁軍之名誌所謂晝巡夜警衛士畏威卽
其事矣又劍南道榮州有威遠軍與此別榮州
今爲榮縣屬四川嘉定府

韋敏夫人李氏墓誌銘

于瀆撰正書
會昌五年正月

存

全文備錄

缺

誌銘

并序

鄉貢進士于瀆撰

夫人李姓燉煌遠孫曾祖承家皇越王府司馬

祖庭琇皇朝散大夫太子典膳郎父袞皇虔州
刺史賜紫金魚袋夫人卽袞之第二女生河東
柳氏嫁京兆韋敏敏先夫人而歿夫人爲女淑
爲婦幹奉釋仰道雖緇衣黃冠不能嘉也偕六
親奉八敬假假然不搖其儀擣幼指卑入則窮
善夫之前嬈有女有男撫育煦暖雖熟知審識
者亦不辨其罪出也四十五年稱未亡人計生
活於郊屋荆扉瓦牖食音糠糲羹藿眉不蹙澁怡
怡然若居朝市食香脆也開成四年八月廿二
日無疾不痛疊足如寐歿於京兆府雲陽縣龍

雲鄉韋之舊業享年六十六隣里鄉黨痛若已
屬用會昌五年正月二十日葬於興平縣茂陵
鄉肺浮原接先夫人適韋門口敏第一娶是不
歸耐夫人已無有出韋前室男曰通娶李氏官
及成都新繁尉女曰婉妻滎陽鄭氏皆前夫人
而終通之子嗣實茂實皆順而孝悲奉葬具已
得兆時祈外兄鄭茂卿請識墓於京兆于濱濱
于鄭之親亦鄭于韋之類也是爲銘曰 嘻夫
人生有云女良族婦德門坊有儀揉不紛跂道
釋瞭無昏母厥家法可尊嗚呼兮復其魂遽安

兮穴有墳

此石本出興平今爲三原北城李氏家藏撰文
之于瀆見新唐書宰相世系表云瀆字子漪泗
州判官藝文志于瀆詩一卷瀆於唐時亦有文
名者此誌古雅可誦有韓柳風格文中尙缺一
字又誌中不能嘉也之嘉當作加亦不辨其罪
出也罪字當作非皆上石之譌未能更定也又
假假然三字未知所本 夫人系出燉煌新唐
書宰相世系表云隴西李氏定著四房一曰武
陽二曰姑臧三曰燉煌四曰丹陽今以表考之

但有燉煌之目而表文已逸夫人世系無從考證矣 誌云夫人生河東柳氏柳氏蓋夫人外家猶云所自出也 新唐書百官志東宮官屬典膳局典膳郎二人從九品下

西明寺尊勝陀羅尼經幢

行書

無年月上下俱缺後有讚及社官郝元諒社錄程瞻等名

存

讚見金石萃編

賓宇訪碑錄云在三原關中金石記云在三原縣西北田村

殘經幢

正書

無年月

存

在三原縣學使署中跋云吳縣郭鳳翔於三原
城東訪得此石移置學署西院錢唐沈兆霖記
整屋縣

唐

宗聖觀記

歐陽詢撰序并入分書陳叔達撰銘
武德九年二月元人重刻

存

全文見金石萃編

雍州金石記云在整屋縣樓觀臺大殿前趙子
函云係元人重刻今觀其字體稚弱無率更勁
挺之氣子函之說良然也

宗聖觀主尹尊師碑

員半干撰入分書
開元五年十月

元人重模本

全文見金石萃編

存

雍州金石記云在整屋縣樓觀臺

夢眞容碑

張九齡奏蘇靈芝行書
開元二十九年六月

重模本

存

全文見金石萃編

雍州金石記云在整屋縣南三十里樓觀臺案
直隸易州亦有此碑係原刻本

案通鑑唐紀元宗開元二十九年春夢元元皇
帝告云吾有像在京城西南百餘里汝遣人求
之吾當與汝興慶宮相見上遣使求得之於整

屋樓觀山間夏閏四月迎置興慶宮五月命畫
元元眞容分置諸州開元觀夢眞容碑卽紀此
事惟此碑題爲張九齡奏其謬特甚考通鑑九
齡於二十四年罷相二十五年貶荊州長史二
十八年二月卒夢眞容事在二十九年而題爲
張九齡奏蓋重模者謬爲附會也是時牛仙客
方居相位故易州本題云中書門下兵部尙書
兼侍中牛仙客等奏時代方合况九齡爲唐時
賢相史言其遇事無大小皆力爭使九齡居相
位元宗爲此荒誕不經之舉九齡必力爭之斷

不如仙客之隨聲附和阿諛取容也噫古之賢士名臣爲不通史事者謬爲附會受誣者多矣余故表而出之俾知考證古刻非特供文字翫物之好也

褒封四子敕

正書
天寶元年二月

未詳所在

全文見金石萃編

雍州金石記云在盤屋縣南三十里樓觀臺余因未見拓本其存逸未可知故云未詳所在四子者莊子爲南華真人列子爲沖虛真人文子爲通元真人庚桑子爲洞靈真人其四子所著

書并隨號爲真經李肇國史補曰天寶中天下

屢言聖祖見

聖祖謂老聃也夢真容卽指老聃而言

因以四子列

學官故有僞爲庚桑子者其辭鄙俚非古人書

庚桑子一作亢倉子

元元靈應頌

戴璇撰序劉同升撰頌戴汲八分書天寶元年七月元人重刻

存

全文見金石萃編

趙岷遊終南山樓觀臺宗聖觀記曰此碑刻於宗聖觀記北面唐人分書甚佳但經元人翻本減弱矣碑側蘇軾書詩并弟轍詩歲久剝蝕元人別摹一碑視碑側字法亦減

渭南縣

唐

渭南令李君清德碑

馬吉甫撰正書
聖歷二年十月

未詳所在

文見金石萃編僅存五十餘字

金石萃編云此碑在渭南縣爲元人翻摹泰甯

宮記字跡隱隱獨存案歐陽公集古錄亦載

此碑

清源公王忠嗣碑

元載撰王紹行書
大歷十年四月

存

全文見金石萃編

雍州金石記云在渭南縣西門外關中金石記

云在鄉賢祠

富平縣

北魏

魏氏造像記

正書

正光五年歲次甲辰六月

存

全文見金石萃編補遺

今在富平縣碑陽刻佛像皆魏氏題名碑側刻

記

都督樊奴子造像記

正書

太昌元年六月

存

全文見金石萃編補遺

今在富平縣碑陽碑陰皆刻佛像及地獄變相

并題名牌側刻造像記字樸而秀

僧擿造像題名 正書 無年月

存

全文見金石萃編補遺

今在富平縣

西魏

曹續生造像記 正書 大統五年二月

存

全文見金石萃編

寰宇訪碑錄云在富平

唐

潁川定公韓仲良碑 于志甯撰王行滿正書 永徽六年八月

存

全文見金石萃編

今在富平縣淡村帖賈胡氏親往椎拓故知其

詳或以爲在三原及富平縣學者誤

美原神泉詩序

韋元旦撰尹元凱篆書垂拱四年四月

存

美原神泉詩

徐彥伯等撰尹元凱篆書垂拱四年四月卽前碑之陰

存

全文見金石萃編

關中金石記云在富平縣美原鎮

臨淮武穆王李光弼碑

顏真卿撰張少師行書廣德二年十一月

存

全文見金石萃編

雍州金石記云在富平儒學案郭敬之家廟碑

卷七
亦建於廣德二年十一月與此碑年月同郭碑
雍容朗暢此碑陷厲發揚蓋李郭勛名爲有唐
中興之冠非魯公鉅筆不足以掄揚之也

案此碑亦見鄭樵通志金石畧云顏真卿撰張

少悌行書喬三石氏

世寯

耀州志則云此碑係

魯公書并言通志之誤今案拓本實張少悌書
通志固不誤也明人疏於考證每以武斷爲能
如益州太守景君銘王鳳洲謂漢有益州刺史
無益州太守其實益州太守卽益州刺史所部
也三石之誤毋乃類是

贈司空薊郡忠烈公李楷洛碑

楊炎撰史惟則八分書

大歷三年三月

存

全文備錄

大唐贈司空范陽大都督口雲麾將軍左羽林

口口將軍充朔方節度副使都知兵馬使上

柱國薊郡忠烈公李府君神道之碑

并序

尚書禮部郎中知制誥楊炎撰

朝散大夫守都水使者集賢殿學士仍翰林

院待詔上柱國口口史惟則書并口口額

秦霸也張祿去魏漢興也淮陰離楚永唯風雲

之會虵變泥蟠之才逶迤咸通口口口其冥
數也豈人力也 皇唐贈司空范陽大都督

李公諱楷洛字楷洛其本出於隴西八代祖節
後魏爲雁門守口口之亂族口鮮口東遷號勇
將之家北部貴大人之種其主渤海其居口斗
海塞迴抱與公之氣口口口爲國之祥英靈
混茫熊據龍驤口其形得山河之狀觀其銳口
金鼓之威神明爲徒義勇口口初口口中以驍
騎歲入遼西東臨太原南震燕趙口火照於河
上天兵宿於北門 朝廷憂之口命招諭

公以偉抱際於天人語言威容口劍歎息口歲
以控弦之士七百騎垂橐入塞解甲來朝以其
本枝復賜李氏授玉鈐衛將軍左奉宸內供奉
圖形雲閣之中置酒蓬萊之上君臣相賀口衛
生光君子曰井谷不可以游龜龍蟻垤不可以
栽松柏漢於是始靖虜於是始憂是後殪靺鞨
於鴨綠之野覆林胡於榆關之外口口口口壞
其王庭南救河源復其孔口石堡之口口口口
口三軍口口口口以口口口精勁褒封之口口
口口口口口口口口授雲麾將軍口口口口

日左飲青海北登狼山□□□□□□□□

天威震於四國口氣聞於海外故得

大命三錫天口輅車參定國者前朝拖侯服者

四紀會兵車者百勝出帳下者千人國有事未

嘗不勞公無私可謂知禮□□□□□□□□

口口口口口口口口口口出

窮荒天寶元年五月廿口口河源薨於懷遠縣

之師次春秋六十七追贈營府都督明年詔

葬於富平縣檀山原維公□□□□□□□□

心和能口口成勁旅口乎耳目之外口乎變化

之中震呼戎墮嘯行口口虎之悍以禮成口
馬之強以謀勝故鮮卑口之以口中國 天后
取之以空大漠於 中宗開朔方之

地數百里於

睿宗食佐命之邑三

千戶

元宗口口口吞諸戎東西

南北不口口剋取口安通凡十九愈爲口口口
公長子太尉中書令江淮河南口口副元帥臨
淮郡王光弼少子太子太保御史大夫渭北鄜
坊口口節度使武威郡王光進負河圖以列四
星遇 英主而當口口

卷一
三
口口之功復區宇 今上之口口口口爲毛
畢乾元中天子以公炳德丕煥積仁流慶大福
再成口口不朽乃命太常追考功績謚曰忠烈
贈司空范陽口大都督口口口韓國夫人於
是建廟堂命宗祝室有山龍之服樂有鐘石之
和昭宣令圖是有銘篆銘曰

口口口口口於此是生純臣其口口口於鏐
府君蔚其英聲虬蟠口極鵬化窮溟口於本邦
會此天庭口口口口口口口口口口口口口
口口口口口口口口口口口口口口口口口

□
□
□
□
□

卷之五 富平縣

本相同者敘文中惟君子曰井谷不可以游龜
龍蟻垤不可以栽松柏又拜玉鈐衛將軍左奉
宸內供奉又左飲青海北登狼山又參定國者
前朝拖侯服者四紀會兵車者百勝出帳下者
千人國有事未嘗不勞公無私可謂知禮又薨
於懷遠縣之師次春秋六十七追贈營府都督
明年詔葬於富平縣檀山原又乾元中以公炳
德丕赫積仁流慶追考功績謚曰忠烈又韓國
夫人於是建廟堂命宗祝室有山龍之服樂有
鐘石之和昭宣令圖共二十七句相同銘詞中

惟帝命韓國祚於夫人亦詔薊邛下寵明禪四
句相同且字句前後互異彼此懸殊迴不相侔
矣又參定國者前朝版本前朝作所軍懷遠縣
版本作懷定縣營府都督版本作營州都督樂
有鐘石之和版本樂字誤饗字鐘字作金字又
碑云謚曰忠烈版本作謚曰忠遺去烈字均當
從碑爲正又碑云乾元中贈公爲司空范陽口
大都督版本未載碑云公長子太尉中書令江
淮河南口口副元帥臨淮郡王光弼版本但云
太尉臨淮郡王兼侍中又碑云少子太子太保

御史大夫渭北鄜坊口口節度使武威郡王光
進版本但云太保光進皆不若石刻之詳蓋撰
文在前上石在後故能文減而事增考古者不
可不知也余友戈青侯履徵雅好金石搜訪甚
勤嘗以此事相質因爲詳考如右載於是編以
補金石諸書之未備 碑云楷洛八代祖節爲
後魏雁門守後以避亂東遷新唐書光弼傳及
光弼神道碑均未載得此可補其缺焉

楷洛爲李光弼父其事附見新唐書光弼傳云
楷洛營州柳城人本契丹酋長武后時入朝累

官左羽林大將軍封薊郡公吐蕃寇河源楷洛
率精兵擊走之初行謂人曰賊平吾不歸矣師
還卒於道贈營州都督諡曰忠烈史中所載多
與碑合又李光進傳云母李本有鬚數十長五
寸許封韓國太夫人卽碑中所云韓國夫人也

○新唐書地理志鄯州鄯城縣有河源軍方輿
紀要云唐鄯城縣城在陝西西甯鎮西南河源
軍亦在西甯鎮西南

今爲西甯府治西甯縣改隸甘肅省通典云

河源軍在鄯州西百二十里

唐鄯州治湟水縣今爲碾伯縣隸甘

肅西甯府唐懷遠縣屬靈州今爲甘肅甯夏府治甯

夏縣新唐書百官志左右領軍衛曰左右玉鈐
衛左右千牛府曰左右奉宸衛天下兵馬元帥
副元帥掌征伐兵罷則省又百官志云禮部郎
中一人從五品上都水使者二人從五品上集
賢殿學士屬中書省五品以上爲學士又百官
志云唐初知制誥皆中書舍人正五品上爲之開元
初以他官掌詔敕策命謂之兼知制誥楊炎以
禮部郎中知制誥卽其職矣唐人文集及碑版
題銜凡以郎官知制誥者未見有書兼字者又
翰林學士入院一歲遷知制誥未知制誥者不

作文書 李肇國史補云德宗在東宮雅知楊

崖州

楊炎罷相後貶崖州

嘗令打李楷洛碑釘壁以玩卽

指此碑而言也

六井經幢并銘

僧昔真撰銘康玢行書大歷六年十月

存

銘見金石萃編

今在富平縣六井

清淨智慧觀身經

田名德集晉王羲之行書

存

京兆府美原縣永仙觀碑文

蕭森撰并模集晉王羲之行書大歷六年

存

全文見金石萃編

雍州金石記云在富平縣美原鎮案此二碑金石諸書所載多有舛駁之處今以拓本考之第一行題曰清淨智慧觀身經 三皇內景弟子永仙觀主兼檢校奉先等縣威儀田名德集晉右軍王羲之書至第九行跳行寫題曰大唐京兆府美原縣永仙觀碑文 朝散大夫兼丹州別駕上柱國蘭陵蕭森字從政撰并模集王右軍書二碑同刻一石又在一面昔人考訂未詳故未分晰其實觀身經文係道藏文字田名德集右軍書勒石亦猶唐人重刻陀羅尼經之意

而永仙觀碑文則蕭森敘述田名德集右軍書
鐫刻經文并重建觀宇之事非二碑也至田尊
師德行頌係內供奉惟光所書刻於此碑之陰
又田名德題銜云集晉右軍王羲之書此處當
云右軍將軍方合祇書右軍二字非官銜矣蓋
道流不知掌故之過也若蕭森題銜稱爲王右
軍則合矣 新唐書百官志上州別駕一人從
四品下地理志丹州上州也 唐丹州治義川縣
即今陝西延安府
屬宜川縣

永仙觀主田尊師德行頌

惟光行書
無年月

存

全文見金石萃編

此碑在富平縣美原鎮刻於觀身經碑之陰碑
無年月內有寶應元聖文武皇帝尊號考新唐
書代宗紀廣德元年七月壬寅羣臣上尊號曰
寶應元聖文武皇帝是此碑當刻於代宗時矣
碑中所頌田尊師卽永仙觀主田名德也

義陽郡王符璘碑

李宗閔撰柳公權正書

存

全文見金石萃編

雍州金石記云在富平縣儒學案此碑無立石
年月李宗閔題銜云守中書侍郎同中書門下

平章事金石錄謂宗閔於大和七年爲此官故

列於大和七年

寶刻類編同

今案新唐書宰相表大

和三年八月甲戌吏部侍郎李宗閔同中書門

下平章事

通鑑同

七年六月乙亥宗閔檢校禮部

尚書平章事興元節度使

通鑑作山南西道節度使唐山南西道治

興元府一名梁州即今陝西漢中府也

八年十月庚寅李宗閔守

中書侍郎同平章事

通鑑守中書侍郎作爲中書侍郎

九年六

月壬寅宗閔貶明州刺史

通鑑同

金石錄列此碑

於大和七年考大和七年宗閔方爲山南西道

節度使碑中并無節度之銜其非七年明甚宗

閔於大和八年十月守中書侍郎同平章事與
碑中題銜恰合至九年六月又復外貶是此碑
之立當在大和八年之冬九年春夏之交方與
表合也又碑末一行邵建和題銜云守京兆周
城府折衝案周城府亦京兆百三十一府之一
史逸其名得此可補其闕焉 新唐書百官志
禮部尙書一人正三品中書侍郎二人正三品
○碑林元秘塔碑摹拓旣久規模雖存頗乏神
采惟此碑及碑林馮宿碑西安蒲署魏公先廟
碑永壽縣劉沔碑河南洛陽縣高元裕碑雖間

有刊缺而所存之字精神煥發習柳書者所當知也